

— Ta'til ham o'qish, — deydi qoraqalpog'istonlik tengdoshlaringiz.

5-bet

Vatan yagonadir, Vatan bittadir!

Tong

YULDUZI

O'zbekiston Respublikasi bolalar va o'smirlar gazetasi

Gazeta 1929-yil 1-avgustdan chiqa boshlagan

2008-yil  
16-iyun  
N:24  
(66669)



**Aziz o'quvchilar!**

Eng sevimli va eng arzon  
gazetangizga yilning ikkinchi  
yarmi uchun

**OBUNA**

davom etmoqda. Istalgan aloqa bo'limlarida  
qadr don gazetangizga obuna bo'lishingiz mumkin.

## OROMGOHLAR CHORLAMOQDA

Xalq ta'limi vazirligining «Mehribonlik» yozgi sog'lomlashtirish oromgohining 1-mavsumida dam olish uchun Navoiy, Samarqand, Sirdaryo, Toshkent viloyatlari va poytaxtdagi «Mehribonlik uylari»ning eng namunali va a'lochi tarbiyalanuvchilari yo'l oldilar.

## GULSHANDA SPORTSEVARLAR

Qarshi shahridagi Gulshan mahallasida zamonaviy bolalar sport majmui qad rostlagan. Mahalla bolalarining bo'sh vaqti shu yerdagi sport to'garaklarida o'tadi. Yaqinda shahar hokimligi tomonidan yosh sportchilarga sport kiyimi va anjomlari topshirildi. Kam ta'minlangan oilalarning farzandlari uchun pul qo'yilgan omonat daftarchalari bolalarni yana-da xursand qildi.

## BOG'DA BOLALAR GAVJUM

Ayni ta'til kunlarida Samarqanddagi «Yoshlik» istirohat bog'i bolajonlar bilan gavjum bo'lmoqda. Bu yerda 20 dan ortiq atraksion, kompyuter va turli o'yingohlar dam oluvchilar xizmatida.



Bundan bir necha kun oldin Mirobod tumanidagi 218-umumta'lim o'rta maktabda «Tong yulduzi» gazetasi jamoasi bilan ijodiy uchrashuv bo'lib o'tdi.

Katta-katta auditoriyalarda yuzlab muxlislar bilan muloqotlar o'tkazib kelayotgan jamoamiz xodimlari uchun atigi bittagina 8-«G» sinf o'quvchilari bilan uchrashuv o'tkazish, ochig'i, erish tuyuldi. Muloqotimiz ham uzoqqa cho'zilmasligiga ko'zimiz yetib turuvdi. Sinfga kirib joylarimizni egalladik. Butun sinf o'quvchilari joylaridan turib qo'llarini ko'ksilariga qo'yishgancha Davlatimiz madhiyasini ijro etishdi. Turli-tuman lavhalar namoyishidan keyin bir narsaga iqrar bo'ldik. Bu sinf hazilakam emas, shekili.

O'quvchilar gazetaga doir o'zlarini qiziqtirgan savollar bilan murojaat qilish bilan birga, ayrim taklif va mulohazalarini ham o'rtaga tashladilar. Asosan,

adabiyotga ixlosmand o'quvchilar ko'pligi sezilib turgan sinf bolalarini biz ham turli fanlar bo'yicha savolga tuta boshladik. Matematika, fizika, kimyo, biologiya, hattoki astronomiyaga oid berilgan savollarga ham bir zumda javob topishgani bizni juda quvontirdi.

Ertalab boshlangan davra peshin paytiga borib yana-da qizidi. Jamoamiz iqtidorli o'quvchilarni taqdirlash uchun olib borgan tarixiy va zamonaviy mavzudagi kitoblar ham yetmay qoldi. Bolalarning chaqna b turgan



ko'zlari bugungi tadbirdan mamnun ekanliklarini yaqqol ko'rsatib turardi.

Maxsus muxbirimiz

## SULOLANGIZNI BILASIZMI?

- Bobo, bobongiz haqida gapirib bering, - so'radi Farrux.
- Oh bolajonim-a, bobomni ko'rmaganman. Otam esa besh yoshligimda olamdan o'tgan.
- Ustozimiz, shajarangizni tuzib keling, deganlarida ko'pchilik o'z shajarasini tuzdi. Men esa qiynaldim.

Aziz o'quvchi, biz kamida yetti avlod-ajdodimizni bilishimiz kerakligi haqida ko'p eshitamiz. Farzand, nevara, evara, chevara, kavara (panevara), ovora va begona.

Bizning ilmiy-texnikaviy tibbiyot hujjatlari markaziy davlat arxivi xodimlari bu xayrli ishga o'z hissalarini qo'shmoqdalar.

Ayniqsa, arxiv rahbari Mastura opa boshchiligidagi ko'plab tadbirlar uyushtiriladi. Bugungi kunda «Shajara» deb nomlangan seminarga qizg'in tayyorgarlik ko'rilmogda. Bu kabi tadbirlarda tarixchi olimlar, o'z shajarasini tiklashga qiziqqan o'g'il-qizlar ham ishtirok etishlari mumkin.

Bizning maqsadimiz o'z ajdodlari bilan qiziqqan va uni tiklashga harakat qilgan yurtdoshlarimizga yordam berish, ularni qo'llab-quvvatlashdir.

Sizlar ham bu ishda bizga yordam berasizlar, degan umiddamiz.

Muhayyo MUSAYEVA,  
kichik ilmiy xodim

## GEODEZIYA NIMA DEGANI?


Shahrimizdagi geodeziya va portografiya kasb-hunar kolleji haqida eshitganmisiz? U yerda qanday mutaxassislar tayyorlanadi, deysizmi? Siz kabi bu maskanga qiziqib qolgan o'quvchilarga ma'lumot berish maqsadida, kollejda «Kasblar festivali» o'tkazilib kelinmogda. Bu haqda kollejning o'quv ishlari bo'yicha direktor o'rinbosari Shirin aka To'ychiboyev shunday deydi:

- Avvalo, shuni ta'kidlashim kerakki, bizning kollejimiz 6 yo'nalishdagi mutaxassisliklar bo'yicha kadrlarni yetkazib berayotgan Markaziy Osiyodagi yagona o'quv dargohidir. Bizning talabalar bir so'z bilan aytganda, davlatimiz boyliklarini baholab, ulardan unumli foydalanishni ta'minlaydigan mutaxassislar bo'lib yetishib chiqadilar.

Bugun har bir bitiruvchini kirish imtihonlaridan o'ta olamanmi, degan savol qiynayotgan bo'lsa kerak. Kollej rahbari Yendir aka Davlatovning aytishicha, bu yil «Yoshlar yili» munosabati bilan o'quvchilar 9 yillik o'quv attestatlaridagi to'plagan ballari bo'yicha qabul qilinadilar. Shuningdek, har qanday savollariga qo'shimcha ma'lumotlar olishlari uchun abituriyentlarga haftaning shanba kunlari «Ochiq eshiklar kuni» davom etmogda. Hozirning o'zida sizda bir savol tug'ilgani tabiiy: geodeziya o'zi nima degani? Geo - «yer», deziya - «qirg'ib olaman» ma'nolarini anglatadi. Shunday qilib, yer haqida ma'lumot degani ekan. Xullas, bu sohaga qiziqib qolgan bo'lsangiz, sizni ushbu maskanga taklif etamiz.

SAYYORA

**XITOIY XALQ HIKMATI**  
**Farzandlarning ota-onasiga havas qilganidan ko'ra, ota-onaning bolasiga havas qilgani yaxshiroqdir.**



- Ukajon, yur, butun O'zbekistonni aylanib kelamiz...

O'QISHLARIM

Hamma fanlardan a'lo O'qiyman besh bahoga. O'qishlarim soz deyman, Bilganlarim oz deyman.

Muallim qo'yganda besh, O'zimga «balli» deyman. Meni tark etmas ishonch, Tinmay kitob o'qiyman.

Zeboxon RASHIDOVA,  
Qashqadaryo viloyati,  
Dehqonobod tumanidagi  
6-maktabning 4-«A»  
sinf o'quvchisi

## Yigitlarga ochiq maktub QO'SHNINGIZNI CHAQIRMANG...

Bugungi kunda qizlarni hayotga tayyorlovchi o'quv markazlari juda ko'payib ketgan. U yerda qizlar tikuvchilik, pazandachilik, soch turmaklash kabi hunarlarni o'rganadilar. Shuning uchun ham zamonamiz qizlarining qo'llaridan kelmaydigan ish yo'q, deb ayta olamiz. Ammo yigitlar-chi? Tan olish kerak, yigitlarni hayotga tayyorlovchi o'quv markazlar sanoqli. Zamonamiz yigitlarining aksariyati dazmol tuzatishni, xomtok qilishni, jo'mraklarni ta'mirlashni deyarli bilishmaydi. Ba'zan chiroq lampasini almashtirish uchun ham qo'shnini chaqirib chiqqanlarning guvohi bo'lganman.

Ayni damda qizlarni «chertib-chertib» tanlayotgan yigitlarning o'zlari ro'zg'or ishlariga yaroqlimikinar? Yigit kishiga qirq hunar oz, degan naql faqat kitoblarda qolib ketmadimikin? Siz bunga nima deysiz, aziz yigitlar?!

Muxlisa MUSAXO'JAYEVA

## «QURALAY» - MUSTAQILLIK TENGDOSHI

Xalq og'zaki ijodi an'analarni davom ettirib, el mehrini qozongan ansambl YUNESKO e'tirofiga ham sazovor bo'layotgan «Quralay» bolalarga xos milliy o'yinlar, qo'shiq va raqslarni, urf-odat va marosimlarni asl holda targ'ib etish, iqtidorli yoshlarni izlab topish, milliy san'atimizni rivojlantirishga munosib hissa qo'shayotgan jamoalardan biriga aylangan.

«Muchal  
«Chillak

bobo»,  
yona»,  
o'yin»,  
sayli»



«Quralay» ijrosidagi to'y», o'yin», «Dehqon «Shodi- «Tol «Navro'z kabi qo'shiqlar ulashadi. qulov, Jamoadagi Sh.Izzatullayev, B.Xudoy- X.Xolboyeva, U.Shoyimov kabi xushovoz xonandalar, G.Hamroyeva, Z.Normatova, F.G'afforova, M.Bo'riyeva kabi o'yinchilar mahorati tahsinga sazovor.

- «Quralay» ishtirokchilari «Boysun» xalq folklor-etnografik jamoasi izdoshlaridir, - deydi ansambl rahbari U.Yo'ldoshev. - Jamoa repertuaridagi har bir asar katta tarbiyaviy ahamiyat kasb etadi.

«Quralay» xalqimiz qalbidagi asl durdonalarni olib, yangicha talqinda yana xalqimizga yetkazayotgani bilan e'zozlanadi. Zero, xalqona qadriyatlar umrboqiydir.

Zamira TO'LAGANOVA,  
Surxondaryo viloyati

Kattalar, e'tibor bering!

## KELAJAK YOSHLAR QO'LIDA!

9-sinfni ham yakunladik. Menimcha, har bir o'quvchi o'z kelajagini o'zi yaratadi. Shuning uchun ham har



taraf lama o'ylab, o'zimiz sevgan kasbni tanlashimiz lozim. Lekin hozirgi kunda ota-onalar farzandlarining ko'ngliga qaramay ish tutmoqdalar. Aniqrog'i, farzandlarining qiziqishlarini inobatga olmay, o'z orzu va xohishlariga ko'ra ularga o'zlari kasb tanlab beryaptilar. To'g'ri,

har bir ota-ona farzandiga faqat yaxshilikni ravo ko'radi. Lekin bu borada, ya'ni kasb tanlashda yoshlarning ham ko'ngliga quloq tutish kerakmikin?

Umida AHMEDOVA,  
Namangan viloyati





Mana, aziz o'quvchilar, intiqib kutilgan ta'til kunlarini ham boshlab yubordingiz. Darsliklar bilan liq to'la papkalarni bir chekkaga qo'yib, mazza qilib dam olishga kirishib ketgandirsiz-a?

Sevimli gazetangiz «Tong yulduzi» ham siz bilan birga ta'tilga chiqdi. «Endi uch oy davomida gazeta o'qimas ekanmiz-da», deya xavotirga tushmang. Gazeta odatdagidek haftaning har dushanbasida «eshigingizni taqillatib» boraveradi. Faqat uning sahifalarida hikoya va ertaklar, qatra, she'r, tarjima va xandalarga yana-da kengroq o'rin ajratiladi, xolos. Maqsadimiz, ta'til kunlaringizning mazmunli, maroqli o'tishiga biroz bo'lsa-da, hissa qo'shishdir.

Shu maqsadda tengdoshlaringizning «Bizning to'garak» sahifasiga yo'llagan ijod namularidan e'tiboringizga havola qilyapmiz.



## «BIZNING



## BIROVGA CHOH QAZISANG...

(Ertak)

Rivoyat qilishlaricha, qadimda bir darvesh bo'lgan ekan. Qishloqma-qishloq yurib, «Kimki qilsa o'ziga...» deya xirgoyi qilganicha rizqini terib yurarkan. Qishloqlardan birida badavlat bo'lsa-da, xasislikda nom chiqargan bir oila yasharkan. Darveshning xirgoyisini eshitgan boyvuchcha ayol: «Shu darvesh ham juda jonga tegib ketdi-da», deya kulchalaridan biriga zahar qo'shib, tandinga yopibdi. Uning shum niyatidan bexabar darvesh issiqqina kulchani qopiga solib, yo'lida davom etibdi. Shu payt ko'chada o'ynab yurgan bolakaylar uning qopini tortqilab, tegajoqlik qila boshlashibdi.

– Qorinlaring ochiqdimi, mana sizlarga issiqqina non, – deya ularga kulchani uzatibdi saxiy darvesh.

Bolalardan biri chaqqonlik bilan uning qo'lidan kulchani tortib olibdi-da, do'stlariga bir tishlam ham bermay yeya boshlabdi.

Bolakaylar uy-uyulariga tarqalishibdi.

Kulchani bir o'zi paqqos tushirgan bola boyning o'g'li ekan. Kechga borib, qornida qattiq og'riq turibdi. – Ko'chada nima yeganding? – so'rabdi onasi xavotirlanib.

– Bir darveshning qopidan issiqqina kulcha olib yegandim, – debdi bolakay og'riqdan ingrab.

– Voy sho'rim, – deya dahshatdan qichqirib yubordi ayol. Kuchli og'riq azobidan holdan toygan bolakay onasining tizzasiga boshini qo'yganicha, jon taslim qilibdi. Onaizorning faryodi yer-u ko'kni larzaga solibdi...

Ko'chadan darveshning: «Kimki qilsa o'ziga...» deya xirgoyi qilgan xazin ovozi eshitiilibdi.

Mohinurbonu YUSUPOVA

## RAYHON VA ATIRGUL

(Ertak)

Xonada ajoyib hidlarini taratib turgan gullarning qizg'in suhbatini boshlanibdi.

– Men hammangizdan ko'rkamman, hidim juda xushbo'y, – deya so'z boshlabdi Atirgul viqor bilan.

– Yo'q-yo'q, men sendan chiroyliroqman, – e'tiroz bildiribdi Chinnigul. – Sening tikonlaring bor, odamlarga ozor yetkazasan. Men esa juda beozorman. Shuning uchun ham odamlar meni sevib, bayramlarda yaqinlariga sovg'a qilishadi...

– Maqtanavermanglar, – suhbatga qo'shilibdi Gulsavsar chiroyli yaproqlarini ko'z-ko'z qilib, – ko'rk-u tarovatda hech biringiz menga yetolmaysiz.

Rayhon esa bir so'z demay turaveribdi.

– Biznikidek chiroyli gullarning yo'qligi uchun suhbatimizga qo'shilolmay turibsanda, – masxaralashibdi uni gullar...

Oradan bir necha kun o'tibdi. Guldonidagi gullar so'lib qolibdi. Uy sohibasi ularni tashlab yuboribdi. Rayhonni esa quritish uchun oshxonaga qo'yibdi. Kamtarligi uchun rayhon odamlarga sevimli bo'lib qolgan.



Shahlo FAYZULLAYEVA

## TO'GARAK»

### VAFODORLIK TIMSOLI

(Voqeyiy hikoya)

Ko'pchilik bolaligida itlardan qo'rqadi. Menda esa aksi bo'lgan, itlarni yaxshi ko'rardim. Ayniqsa, «Sherxon» laqabli kuchugimiz menga juda yoqardi. Bunga quyidagi voqea sabab bo'lgandi:

Yoz kunlarining birida dadam, men, singlim «Bo'zsu» daryosiga cho'milgani borgandik. Sherxonni ham olib borishga dadamni arang ko'ndirdik. Odamlarni qo'rqitib yubormasligi uchun uni daraxtga bog'lab qo'ydik.

Suv juda sovuq bo'lgani sababli, singlim ikkimiz uzoq cho'mila olmadik. Dadam esa suzib, qirg'oqdan ancha olislab ketdilar. Ularning suvga sho'ng'iganlarini ko'rgan singlim xavotirlanib, yig'lab yubordi. Bu holdan Sherxonning ham tinchi buzildi. Mahkam qilib bog'langan arqonini qanday yechib yuborganini bilmayman, o'zini suvga otdi. Aslida u suvni, cho'milishni unchalik xush ko'rmasdi. Lekin shu tobda orqa-oldiga qaramay o'zini suvga otdi va bir zumda dadamning yoniga suzib bordi. Suvga sho'ng'ib-sho'ng'ib cho'milayotgan dadam unga cho'kayotgandek tuyulgandi, chog'i. Sherxonning maqsadini anglagan dadam suvdan chiqdilar va mehr bilan uning boshini silab qo'ydilar.

Meni til-zaboni yo'q jonivorning sezgirligi, jonkuyarligi, vafodorligi hayratlantirdi. Vaholanki, gohida biz aqliraso insonlar bir-birimizdan mehrimiz, ko'magimiz, ozginagina e'tiborimizni ayaymiz. Aslida tabiatning bir bo'lami bo'lmish jonivorlardan o'rganadigan xislatlarimiz ko'pligini tan olmay, ilojimiz yo'q.

Shu voqea sabab, itlarni «vafodorlik timsoli», deya atay boshladim.

Muxlisa TO'LAGANOVA

### SIR OCHILDI

Sinfimizda Hasan-Husan ismli aka-ukalar o'qishadi. Hasan algebradan, Husan esa ona tilidan biroz oqsashardi.

Keyingi paytlarda aka-ukalar har ikki fandan ham yaxshi o'qiy boshlashdi. Sinf rahbarimiz xursand.

Bir kuni ona tili darsida ustoz Husanni doskaga chaqirib, uy vazifasini so'ray boshladilar. Uning dadil-dadil javob berayotganini sinchiklab kuzatib, aslida Husan emas, Hasan javob berayotganini sezib qoldik. Shu tariqa «a'lochi» aka-ukalarning siri fosh bo'ldi.

Nargiza YUSUPOVA

Dilobar SOYIBJONOVA,  
Toshkent viloyatidagi 3-  
maktabning 7-«V» sinf  
o'quvchisining chizgan rasmi.







Qadrli bolajonlar! Agar yodingizda bo'lsa, gazetamizning o'tgan sonlaridan birida «Yashil patrulni bilasizmi?» sarlavhasi ostida poytaxtimizning Sergeli tumanida faoliyat olib borayotgan «Yashil patrul» harakati a'zolarining xayrli ishlari haqida hikoya qilgan edik.


Mazkur harakatni qo'llab-quvvatlash maqsadida, sevimli «Tong yulduzi» gazetangiz ham yaxshi tashabbus bilan maydonga chiqdi. Sergeli tuman hokimligi bilan hamkorlikda «Yashil patrul» respublika ko'riktanlovini tashkil etdi. Maqsadimiz, yashil patrulchilar viloyatlarda ham tashkil etilib, obodonlashtirish va ko'kalamzorlashtirish ishlarida faol ishtirok etishsa. Bu esa juda oson. Do'stlaringiz bilan birlashib maktabingiz, mahallangiz atrofning tozaligini saqlab, chiqindilar to'planishiga yo'l qo'ymang. Hech



## BIR TUP KO'CHAT EKDINGMI?

bo'lmasa, bir tup mevali va manzarali ko'chat eking. Sizning safigizga do'stingiz qo'shilsa, yanayam yaxshi. Ekkan niholingiz yaproq yozganini ko'rganingizda, shunday quvonasizki, buni so'z bilan ifodalash qiyin.

Yuqorida suratlari aks ettirilgan bolalar harakatning faol a'zolaridir. Ular maktablarida «baklashka»lar, qog'ozlar va boshqa chiqindilar uchun maxsus joylar tashkil etishdi. Ularni topshirib, topgan pullariga mahalladagi keksalar va nogironlar uchun sovg'alar olishdi. Ayrim o'quvchilar esa maktab kutubxonasi uchun yangi kitoblar tuhfa etishdi. Harakat a'zolarining bir shiorlari bor: «Yerda yotgan har narsa chiqindi emas, aql bilan qaralsa – ne'mat».



poytaxtimizning 2200 yillik to'yiga hozirdanoq puxta tayyorgarlikni boshlab yubordilar. Ular o'z tumanlarini eng obod va ko'rkam tumanga aylantirishga qattiq bel bog'laganlar. Kelgusi yilda Toshkentimizga ko'plab nufuzli mehmonlar tashrif buyuradilar. Umid qilamizki, obod va go'zal poytaxtimiz ularda katta taassurot qoldiradi.

Aziz o'quvchi do'stim! «Yashil patrul» harakati borasidagi o'zingizni qiziqtirgan savollar haqida so'rang. Tahririyat xodimlari barcha maktublarga javob yo'llashni o'z zimmlariga oladilar. O'z hududingizdagi ko'kalamzorlashtirish ishlari borasidagi yangiliklar haqida bizga yozib yuboring. Biz uni ommalashtiramiz. Keyin esa sergelilik tengdoshlaringiz kabi sovg'alarga ham ega bo'lasiz. Xayrli ishda barchangizga omad yor bo'lsin!

Yusuf ABDULLAYEV

## OZ-OZ O'RGANIB DONO BO'LUR



Donodan so'radilar:  
– Q a h r a m o n bo'lish uchun nima qilmoq kerak?  
– Vatanni sevishning o'zi qahramonlikdir, – javob qildi dono.

\*\*\*



So'radilar:  
– Har qanday odam kamolotga erisholadimi?  
– Inson – mo'jiza. Shunday ekan, u o'zini o'zgartirishga qodir.

Buning uchun chinakam

istak, qanoat, sabr, toqat va hatto o'zida jismoniy kuch ham topa bilishi kerak.

\*\*\*



Olam ulug' kishilarga boy. Har bir qishloqning o'z ulug'lari bor. Sen ham shundaylardan bo'lishga harakat qil.

\*\*\*

Barcha insonlar bir xilda yaratiladi, ammo shakllanish jarayoni har xil kechadi. Yaxshi muhitga intilgan inson el-u yurtning obro'li kishisiga aylanadi.

\*\*\*

Inson bo'lish – eng katta san'at. Bu san'atni yoshlikdan egallagan kishi chinakam baxtli yashaydi.

\*\*\*

Olim, shoir, qonunshunos bo'lish mumkin, lekin xalq aytganidek, «Odam bo'lish qiyin». Ana shu «qiyin tog'»dan o'ta olsang, marra seniki.

\*\*\*

O'z yo'lini topmagan insonning toshchalik qadri bo'lmaydi.

\*\*\*

Chin inson bo'lsang, oila, el-u yurtning bezagiga aylanasan.





# «QORAQALPOG'ISTONLIK O'QUVCHILAR HAM «TONG YULDUZI»NI O'QISHADI»,

O'quv muassasalarida sinov davri davom etmoqda. Yil davomida namunali xulqi va a'lo o'qishi bilan sinfdoshlariga o'rnak bo'lgan o'quvchilar hech qiynalmay sinovdan muvaffaqiyatli o'tmoqdalar.

Ayni imtihon pallasida biz Qoraqalpog'iston Respublikasida xizmat safarida bo'ldik. Safardan maqsad, mazkur o'quv yilida qoraqalpog'istonlik o'quvchilar qanday yutuqlarni qo'lga kiritganliklarini bilish edi.

deydi Qoraqalpog'iston Respublikasi Xalq ta'limi vaziri Begdulla SULTANOV.

Qoraqalpog'iston Respublikasi bo'yicha maktablardagi, maktabdan tashqari ta'lim muassasalarida va boshqa vazirliklar, tashkilotlar tomonidan tashkil etilgan to'garaklarga 55 mingga yaqin o'quvchilar jalb qilingan.

Qoraqalpog'iston Respublikasi Xalq ta'limi vazirligi tomonidan «Ta'lim to'g'risida»gi Qonun va «Kadrlar tayyorlash milliy dasturi» talablarining ijrosi yuzasidan qator ishlar olib borildi. Ushbu dasturning uzviy davomi bo'lgan «2004 – 2009-yillarda maktab ta'limini rivojlantirish Davlat umummilliy dasturini amalga oshirish chora-tadbirlari to'g'risida»gi qarorning qabul qilinishi bilan ta'lim sohasini rivojlantirishga alohida e'tibor qaratildi.

Respublika bo'yicha 760 ta maktabdan 626 ta maktab manzilli dasturga kiritilib, shundan 33 ta maktabni yangidan qurish, 230 ta maktabni kapital rekonstruksiya qilish, 215 ta maktabni kapital ta'mirlash va 148 ta maktabda joriy ta'mirlash ishlarini olib borish belgilandi.

Yoshlarning huquqiy savodxonligini oshirish, ona Vatanga muhabbat va sadoqat tuyg'ularini shakllantirish maqsadida, Qoraqalpog'iston Respublikasi Ichki ishlar vazirligi, «Kamolot» YOIH, «Mahalla» jam'armasi va boshqa tashkilotlar hamkorligida uchrashuvlar o'tkazildi. Yoshlar o'zlarining qiziqtirgan savollariga javob oldilar.

– 2004 – 2007-yillar davomida Respublika bo'yicha 21 ta maktab yangidan qurildi, 119 ta maktab kapital rekonstruksiya qilinib, 126 ta maktabda kapital, 78 ta umumta'lim maktablarida joriy ta'mirlash ishlari olib borildi va foydalanishga topshirildi, – deydi

Qoraqalpog'iston Respublikasi Xalq ta'limi vazirligi «Ta'lim jarayonini ta'minlash» bo'limi boshlig'i Jem'ol Turdiyev.



## AQJIBEK

O'zbekiston Aloqa va axborotlashtirish agentligi Bosh direktori A.Aripov imzosi bilan tasdiqlangan diplom nafaqat Aqjibek Berjanova uchun, balki qoraqalpog'istonlik o'quvchilarning ham yutug'i bo'ldi. U «Internet festivali – 2007» g'olibiga aylandi.

Aqjibek 11-sinfni muvaffaqiyatli tugatyapti. Uning orzusi kelajakda qaysi kasbni egallamasin, Vatanga xizmat qiladigan yaxshi inson bo'lish.

N u k u s s h a h r i d a g i qoraqalpog, qozoq, rus sinflaridan iborat 4-maktabga kirib borganimizda, «Diqqat, imtihon!» degan yozuvga ko'zimiz tushdi. Eshik oldida esa maktab direktori Anjim Salabayeva kutib oldi.




## TA'TIL HAM O'QISH

Opaning aytishicha, maktab o'quvchilari bilimdon, ilm

olishga intiluvchan. Birgina fan olimpiadasida 11 nafar o'quvchi ishtirok etib, shundan 4 nafari Respublika miqyosiga chiqibdi.

O'quvchilar bilimdon bo'lish bilan birga, chaqqon, sog'lom bo'lishga intiladilar. «Sport malikalari – 2008» sport musobaqalarida 2-sinf o'quvchisi Jazlin Ametova o'quvchilardan ustun kelgan bo'lsa, 7-sinf o'quvchisi Ilyos Seytnazarov O'zbekiston Respublikasida o'tkazilgan ochiq chempionatda g'olib bo'lib, maktabdoshlarini birdek xursand qildi.

Respublikada 406 ta maktabgacha ta'lim muassasalari bo'lib, ularda 33 mingdan ortiq bolajonlar tarbiyalanadilar. Ularning sog'lig'ini mustahkamlash, yoshligidan nogiron bolalarga ta'lim-tarbiya berish maqsadida, 31 ta maxsus sanatoriya bolalar muassasalari tashkil etilgan. Ularda 4 mingdan ortiq bolalar ta'lim olmoqdalar. Bog'chaga bormaydigan bolajonlarni maktabga tayyorlash maqsadida, «Yakshanba maktablari» maktabdan tashqari muassasalarda, mahallalarda qisqa muddatli guruhlarda tashkil etilgan.



8 yoshidan musiqaga mehr qo'ygan Ahilbek Piyozov 4-qozoq sinfini yakunlamoqda. U «Yangi avlod – 2007» bolalar ijodiyoti festivalida o'zining sevimli do'mbirasi bilan ishtirok etdi va g'olib bo'ldi.




## «OTAM, ONAM VA MEN CHAQQONMIZ»,

deydi Nukus shahridagi 38-maktabning 4-«V» sinf o'quvchisi Shahnoza JUMABOYEVA.

– Ana shu nomli tadbirda bizning oilamiz sog'lom va chaqqon ekanligini isbotladi.

Jeketerak mahallasidan ishtirok etgan 20 nafar oilalar ichida bizning oilamiz a'zolari g'oliblikni qo'lga kiritdik. Ayniqsa, akam Navro'zning epehilligi hammani hayron qoldirdi.

Tez va ifodali o'qishdan tortib, sport musobaqalarida va hatto pazandachilik sirlarida ham barchamiz birinchi bo'ldik.



Pedagoglar, ota-onalar, maktab o'quvchilari ishtirokida darsliklar va o'quv qo'llanmalarining yarmarkasi o'tkazildi.

Ta'lim qoraqalpog'iston tilida olib boriladigan maktablar uchun «Odobnoma» darsliklarini chop etishda qoraqalpog'iston xalqining tabiati, milliy qadriyatlarini, urf-odatlarini hisobga olish, shuningdek, ta'lim o'zbek, rus, qozoq va turkman tillarida olib boriladigan maktablarning 5-9-sinflari uchun Qoraqalpog'iston tarixi, 7-8-sinflar uchun Qoraqalpog'iston geografiyasi darsliklarini tarjima qilish va chop etish bo'yicha takliflar olindi.



Olti yoshli qizaloqning o'ndan ortiq kitobi chiqibdi, desak ishonasizmi? Yo'q, deyishga biroz shoshilmang.

Gap kim haqida borayotganini bilsangiz, bo'lishi mumkin, deb yuborishingiz tayin. Hikoyamiz qahramoni bolalarning sevimli shoirasi Kavsar opa Turdiyeva asli adabiyotchilar sulolasidan.

Shundanmi, adabiyotga bolaligidan mehrgo'ygan. Jajjigina qizaloq ilmiy ish bilan mashg'ul olimanasining yonida kuymalanar, mitti-mitti



ertaklar, hikoyachalar yozardi. Onasi esa ularni jamlab, kitobcha holiga keltirardi-da, ustiga «Kavsarning birinchi kitobi», «Kavsarning ikkinchi kitobi», deb yozib qo'yaverardi. Shu tariqa ertakchi qizning «kitob»lari soni o'ntadan oshibdi...

— Bolaligimda juda ko'p kasal bo'lardim, — deya xotirlaydi shoir. — Shifokorlarning har bir sanchgan ninasi uchun onam bittadan ertak o'qib berardilar. Ishonasizmi, ko'proq ertak eshitish uchun tez-tez kasal bo'lishga ham, shifokorlarning nina sanchishlariga ham rozi edim.

Onamning yaqin bir dugonalari bo'lib, uyida juda ko'p kitoblari bo'lardi. Bir kuni bizni uyiga taklif qilib: «Qizim katta bo'lib qoldi, endi uning kitoblarini Kavsariga berib yuboraman», deb qoldi. Ularnikidan to'rt

xalta kitob olib kelgan kunimiz tuni bilan uxlamay chiqqanman, desam ishonavering. Rang-barang suratli, chiroyli kitobchalarni xonamning o'rtasiga yoyib olib, yeb qo'ygudek bo'lgandim o'shanda. Oyim ikkimiz ularning barini o'qib chiqqanmiz. Ayniqsa, Agne Bartoning men yod olmagan

o'qish mahoratiga ham qoyil qolgandik. She'rlaridan o'qiganida nafaqat o'quvchilar, balki tahririyatimiz xodimlari ham maroq bilan tinglashganini hamon eslab yuramiz.

Ayni damda Toshkent pediatriya tibbiyot instituti pedagogika, psixologiya, o'zbek, rus va lotin tili kafedralariga mudirlik qilib kelayotgan Kavsar opa juda sermahsul ijod qilyapti. «Varrak», «O'y nayapman», «O'ylayapman», «Qush bo'lib uchgan ona», «Hayvonot bog'i», «Obod mahallam bo'yab» kabi o'nlab kitoblari kutubxonamizdan munosib o'rin olgan. «Orzular ro'yob bo'lgan kun», «Yozma ish», «Ma'naviyatli bo'laylik», «Kasal bo'ldim ta'tilda» kabi ssenariylari bolalarning sevimli ko'rsatuvi

publitsistik va adabiy-tanqidiy maqolalar muallifi hamdir. Ijodkorlardagi bir fazilatni juda qadrlayman, qayerda bo'lmasin, qalbida adabiyotga, she'riyatga ishtiyoq bo'lgan insonlarni qo'llab-quvvatlashga intilishadi. Kavsar opa ham institut talabalari orasidagi yosh ijodkorlarni «Nishona» to'garagiga jamlab, ularga ustozlik qilib kelyapti. To'garak a'zolari ijodidan namunalar jamlangan ushbu «Kuylayotgan yoshlikning tori», «Chorlar bizni «Nishona»miz» nomli to'plamlar chop etilganda, shogirdlarining quvonchiga opa ham chin dildan sherik bo'lgandi.

Kavsar opaning uzoq yillik samarali mehnatlari hukumatimiz tomonidan munosib

biror she'ri qolmagan...

O'rta maktabni muvaffaqiyatli famomlab, oliy ma'lumotni Sankt-Peterburg shahrida olgan Kavsar opa bolalar adabiyotidan sira yiroqlashmadi. «So'nggi davr o'zbek bolalar adabiyotida ma'naviyat masalalari» mavzusida nomzodlik dissertatsiyasini yoqlab, filologiya fanlari nomzodi bo'ldi. Hozirda doktorlik ishini himoya qilish uchun astoydil izlanyapti.

**CHO'ZILIB KETGAN MASHG'ULOT**

Yodimda bor, tahririyatimiz qoshida faoliyat ko'rsatayotgan «Yosh qalamkashlar» to'garagi mashg'ulotlaridan biriga Kavsar opani taklif qilgandik. Uchrashuvimiz shu darajada qiziqarli, maroqli o'tganidan bir soatlik mashg'ulotimiz naq to'rt soatga cho'zilib ketganini sezmay ham qolibmiz.

O'shanda opaning nafaqat ijodiga, balki san'atiga, she'r

**ERTAKCHI QIZ**

«Zumrasha» kinojurnalida sahnalashtirilgan.

Kavsar opa serqirra ijodkor. Kinofilmlar, multfilmlar uchun ssenariylar, qo'shiqlar yozadi. O'tgan yili suratga olingan «Irkivoy va Kirketjon» nomli multfilmini kichkintoylar berilib tomosha qilishsa, yuzlab qo'shiqlarini «Tomosha», «Marvarid», «Bulbulcha», «Sevinch» kabi bolalar dastalari a'zolari maroq bilan kuylashadi. M. To'ychiyev bilan hamkorlikda yaratgan ssenariysi asosida «Katta oyi» nomli badiiy filmi suratga olinyapti. «Prezident archasi», «Navro'z», «O'qituvchilar bayrami», «1-iyun — Xalqaro bolalarni himoya qilish kuni» kabi bayram va tantanalarda ham yozgan qo'shiqlari yangraydi.

Shuningdek, tibbiyot instituti talabalari uchun darsliklar, o'nlab uslubiy qo'llanmalar,

baholanib, «Shuhrat» medali hamda ko'krak nishoni bilan taqdirlangan.

Aslida biror nima qoralashning o'zi mashaqqat, bolalar uchun yozish esa undan-da mushkulroq, deyishadi. Ularga yozish uchun ijodkorning o'zi ham bola qalbli bo'lishi kerak. Shundagina uni «bizniki» deya qabul qilishadi.

Qalbi yozgan she'rlaridek beg'ubor kichkintoylar bilan tillashganda, o'zi ham bola bo'lib ketadigan Kavsar opa Turdiyevani bolajonlar allaqachon «o'zlariniki» qilib olishgan.

Hademay 50 yoshni qoralaydigan shoir opalaridan yangi-yangi she'rlar kutib qolishadi. Kamtarin bir ijodkor uchun bundan-da ortiqroq baxt bormi dunyoda?!

Feruza JALILOVA

**MAHALLAM BOLALARINING TILAKLARI**

Oltin sandiq ochildi,  
Undan tilak sochildi.  
Hammaga katta-kichik,  
Ulashaylik yaxshilik.  
Ha yaxshi-yu ha yaxshi,  
Yaxshi so'zlar ko'p yaxshi.  
Yaxshi so'zlar so'zlaylik,  
Bir-birimiz o'ylaylik.  
Oyim bizdan aylansin,  
Buvim bizdan aylansin,

Uyimizga juda ko'p,  
Shirinliklar joylansin.  
Taq-taq qilar poshnalar,  
Tilak ayting, oshnalar.  
Tilak ayting, dugona,  
Bizlarga yo'q begona.  
Tinchlik bizga yor bo'lsin,  
Osmon beg'ubor bo'lsin.  
Mingga yetsin yoshingiz,  
Omon bo'lsin boshingiz.  
Ko'z tegmasin sizlarga,  
Sizlarga-yu bizlarga.  
Ko'proq tilak olinglar,  
Xayr, yaxshi qolinglar.

**KO'ZBOYLOG'ICH**

Ko'zboylog'ich, ko'zboylog'ich,  
Sen bo'la qolgin poylog'ich.  
Sen ushlab turgin takamni,  
Men ushlay Sanjar akamni.  
O'yinboshi saylanadi,  
Ko'zlarimiz boylanadi.  
«Iliq», «sovuq», «sovuq», «issiq»,  
O'yin juda, juda qiziq.  
Mana tutdim: Sanjar aka,  
Nimadir bu? Bumi? Taka!  
Kavsar TURDIYEVA

**VATAN**

O'zbekiston vatanim,  
Gullarga boy maskanim.  
Bepoyon dasht-u dalam,  
Gulla, yashna chamanim.

Bag'ringda o'smoqdaman  
Ta'lim olib behisob.  
Bilimlarning konisan,  
Muqaddas tengsiz kitob.

Charosxon

**TOSHPO'LATOVA,**  
Surxondaryo viloyati,  
Sariosiyo tumanidagi  
36-maktabning 7-sinf  
o'quvchisi

**O'ZBEKNING QONIDA BOR**

Qatorida qirg'ta nor,  
Har yaprog'i ming chinor.  
Vafo, mardlik, tanti, or  
O'zbekning qonida bor.

Hayot asli tijorat,  
Savdolardan iborat.  
Ko'ksidagi jasorat —  
O'zbekning qonida bor.

Dilida yo'q raqobat,  
Orzulari qatma-qat.  
Kamtarinlik, oqibat —  
O'zbekning qonida bor.

Buyuk elning qudrati,  
Boshlagan imorati.  
Yoshlarning shijoati,  
O'zbekning qonida bor.

Halollig-u pok niyat,  
Tilida ezgu oyat.  
Matonat, nomus, uyat —  
O'zbekning qonida bor.

Dilida yangrar surur,  
Ko'ngli osmon, tanti hur.  
Qalbida milliy g'urur,  
O'zbekning qonida bor.

O'tkir OLIMOV,

Qashqadaryo viloyati,  
Nishon tumani

**OBOD**

**VATANIM**

Bag'ringda yayrab o'sdim,  
Sensan meni jon-tanim.  
Bog'ingni rosa kezdim,  
Go'zal ona Vatanim.

Gullab yashna hamisha,  
Senga talpinar ko'nglim.  
Yuragimda yashaysan,  
Mening ona Vatanim.

Seni jondan sevgaymiz,  
Menga yo'ldosh qalamim.  
Baxtimizga yashnab yur,  
Obod ona Vatanim.

Gulandom

**G'AFUROVA,**  
Shayxontohur  
tumanidagi  
84-maktab o'quvchisi




# «YETTI YOSHGA TO‘LDIK BIZ»

kerak. Bolajonlarning «Maktab yaxshi, u yerda peshinda uxlatishmaydi», degan gaplarini ham ko‘p eshitgansiz-a?

Bugun sizlarga ana shunday orzulari amalga oshib, o‘z bog‘chalarini tark etayotgan Yunusobod tumanidagi 486-maktabgacha ta‘lim muassasasining tarbiyalanuvchilari haqida hikoya qilmoqchimiz. «Gulbahor» nomli bu bog‘chaning «G‘uncha» guruhi tarbiyalanuvchilari «Bilimlar okeaniga sayohat» nomli xayrlashuv kechasini o‘tkazishdi.

*Nima uchun bugun biz  
Quvnoq bayram qilamiz?  
Chunki tez kun ichida  
Biz maktabga boramiz!*

Bolalar yod olishgan shunday she‘rlari bilan tadbirni boshlab berishdi. So‘ng, sahnada bilimlar okeani tomon yo‘l olayotgan kemanding kapitani ko‘rindi. U matematika oroliga kirib kelishayotgani haqida xabar qildi. Bolalar shu orqali o‘ngacha sanab, sonlarni tartib bilan joylab berishdi.



Kema yo‘lida davom etib, bolalar goh bilimlar oroliga, keyin ranglar oroliga sayohat qilishdi. Yo‘lda ular qaroqchilarga ham duch kelishdi. Qaroqchilar bu bolajonlar bilimdon bo‘lganliklari uchun ularni ozod etishdi. Keling, kema kapitani Hayotbek Valiyevning taassurotlari bilan o‘rtoqlashamiz:

– Men bog‘chamni yaxshi

ko‘raman. Chunki bu yaxshi bog‘cha. Ko‘p bayramlar bo‘ladi. Bugungi bayramimiz ham zo‘r bo‘ldi. Men sanashni, hamma ranglarni bilaman. Tarbiyachim aytdilar, biz maktabga tayyor ekanmiz. Endi maktabga boramiz.

Chindan ham ajoyib tarzda sahnalashtirilgan bayram barchaga manzur bo‘ldi. Bu esa guruh




tarbiyachilari Munisa opa Rizayeva va Dilbar opa Alimovalarning mahoratlaridan ham darak beradi. Musiqi rahbari Nilufar opa Shojalilovanning esa bayramlarda o‘rni bo‘lakcha. Axir bolajonlarimiz kuy-qo‘shiqni juda sevishadi.

Umuman, bu bog‘chada mohir tarbiyachilar ko‘p. Ularga ushbu maktabgacha ta‘lim muassasasining rahbari Tohira opa Karimova boshqoshlar. Shunisi e‘tiborga loyiqki, 1974-yil tashkil etilgan ushbu bog‘cha 2001-yilda gepatit kasalligi bilan kasallangan bolalarni sog‘lomlashtirish sanitariya yo‘nalishidagi muassasaga aylantirildi. Tarbiyalanuvchilar uchun fitobar, ularning sog‘liqlariga moslashtirilgan jismoniy mashqlar, turli to‘garaklar tashkil etilgan. Tohira opaning aytishlaricha, bu maskanda bolalar «Uch ming

yillikning bolasi» dasturi asosida maktabga tayyorlanadilar. Shu tufayli bugungi tarbiyalanuvchilar o‘ta zukko, tirishqoq. Buni bog‘cha yoshidagi iqtidorli bolalarning «Oltin xumo» ko‘rik-tanlovida bolalar o‘zlari chizgan suratlari bilan qatnashib, «Faxriy yorliq» bilan taqdirlanganlaridan ham bilish mumkin.

Yuqorida aytganimiz, malakali tarbiyachilardan biri Gulbahor opa Mirzayevaning aytishlaricha, tarbiyachilar ham bolalardan qolishmagan holda turli tanlovlarda ishtirok etib kelishmoqda. Masalan, tuman tarbiyachilari o‘rtasida o‘tkazilgan sport musobaqasida Zumrad opa Qodirova 2-o‘rinni egallagan ekanlar. O‘z kasbdoshlari haqida faxr bilan so‘zlagan Gulbahor opani ko‘rib, biz bu dargohning katta-yu kichigi samimiy, bolalarcha sodda va quvnoq insonlar ekaniga ishonch hosil qildik. Axir kelajakka shunday ma‘naviyatchilar-u zukko yangi avlodlar kerak.

*Sayyora JO‘RAYEVA*



**Nabiralari Behzod va Farhod bilan.**

Ko‘p yillardan buyon «Gulxan» jurnalining badiiy muharriri, mas‘ul kotibi bo‘lib ishlab kelayotgan Mirvosil Odilov doimo qarshingizda kulib turadi. Yaxshi amallar bilan ko‘nglingizni topishga hamisha vaqti bor.

Mirvosil aka tahririyatga kelgan maqolalarni rassomlarga layoqatiga qarab tarqatardi: «Portretni Osimxon Vosixonov boplaydi. Hikoya va she‘rlar uchun rasm chizishga Rustam Zufarov usta, dizaynini esa birgalikda yaratamiz», deydi.

– Maktab vaqtida kundalik tutgansiz-a? – dedi bir suhbatda jurnal uchun tayyorlanayotgan taqvimga ishlov berayotib. – Ta‘tilga chiqsak, kundalikning varaqlariga «kanikul» deb yozib qo‘yardik. O‘qituvchimiz tanbeh berardi:

– Kundalik varag‘ini isrof qilmanglar, ta‘til yozilgan kun sanasidan ma‘lumku!

Oramizda birgina bola tejamkorlik bilan kundalik to‘ldirgan ekan. Hozir o‘sha sinfdoshimiz Toshkentdagi eng peshqadam tijoratchilardan biri.

Mirvosil aka gapini tugatgan ham edi, telefon jiringlab qoldi. Go‘shakni olib, «Labbay» deb javob berdi. Kim bilandir gaplashib, kayfiyati xiralashganday bo‘ldi.

– Telefonda gaplashishni ham bilish kerak, – tutoqdi u. – Bir tanishim

qo‘ng‘iroq qilishimni qayta-qayta so‘radi. Qo‘ng‘iroq qildim. Go‘shakdan ovoz kelgach, «Assalomu alaykum», dedim. Qizi bo‘lsa kerak, dabdurustdan: – Kimsiz, sizga kim kerak, – dedi. Go‘shakni joyiga qo‘ydim. Qo‘ydim-u, bolalarimga ibrat bo‘lmog‘i uchun bo‘lgan gapni aytib berdim. Birozdan keyin yana sim qoqdim.

– Sizga kim kerak o‘zi, kim bo‘lasiz? – eshitildi yana o‘sha ovoz.

– Men... Mirvosilman, – dedim jiddiy ohangda.

– Men sizni tanimayman, qayerga telefon qilayapsiz o‘zi?

Noiloj ranjiganimni ma‘lum qildim:

– Qizim, meni tanimas ekansiz, otangizni chaqiring, kimligimni so‘rab nima qilasis?

Mirvosil aka arzimagan voqea bo‘lib ko‘rinadigan, aslida esa insoniy munosabat yotgan telefon hangomasini davom ettirdi: – Ba‘zida go‘shakni ko‘tarib, «Labbay» deyishing bilan: – Bonu! Bonumisan? Bonularning uyimi? – degan ovoz keladi.


## BOLALIGINI YO‘QOTMAGAN RASSOM

Adashib tushganligini bilib, go‘shakni joyiga qo‘ydi.

O‘ylanib qolasan, xo‘sh, Bonuning otasi bo‘ldim, deylik. Oddiy salomlashish odobini bilmaydigan qizga o‘rtoq bo‘lgan «qizim»dan ranjimaymanmi?

Barchaga birday ehtirom ko‘rsatib yuradigan Mirvosil akadek o‘z ishiga fidoyi, hayotga sinchkov ko‘z bilan qarovchi, o‘ta andishali va mehrlil, bolaligini yo‘qotmagan ijodkor-rassom ijodiga baraka tilaymiz.

*Ithom AHROR*



**– Qani, ketdik...**




# YAXSHI

Bugungi kunda barakali ijod qilayotgan ko'plab bolalar shoirlarining ustozlari, zahmatkash inson, o'zbek bolalar she'riyatining tolmas targ'ibotchisi, ajoyib tarjimon Tursunboy Adashboyevning yaqinda «Sharq» nashriyot-matbaa aksiyadorlik kompaniyasi Bosh tahririyatida «Latifboyning loflari» kitobi chop etildi.

Uning mazkur kitobiga avvalgi kitoblaridan o'rin olgan she'rlar bilan birga yangi turkumdagi loflari, tabiat muhofazasiga bag'ishlangan balladalar, bag'ishlovlari, ertak, doston va jahon bolalar adbiyoti amalga oshirgan tarjimalari kiritilgan.

Qissadan hissa chiqarish Tursunboy Adashboyev ijodiga xos fazilat bo'lib, muallif bu borada o'quvchiga, kitobxonga suyanadi.

Kitob oltita bo'limdan iborat. Shoir har bir bo'limga kiritilgan asarlarida tabiat haqida yonib kuylaydi, onaga, Vatanga bo'lgan mehr-muhabbatni



ulug'laydi, o'zining olis bolalik yillariga xayolan sayohat qiladi.

«Latifboyning loflari»ni o'qib, o'zingiz ham lof to'qib yuborganingizni bilmay qolasiz. O'sha Latifboyi tushmagur hali tug'ilmasdan turib bobosi bilan yilqi boqadi, xarsang toshlarga qoziqlar qoqadi. Chigirtkaga egar urib, yugan soladi. Uni minib, tulki oviga jo'naydi. Bular-ku Latifboyning quruqlikdagi sarguzashtlari.

U Bahri ummonda Asad degan do'sti bilan yong'oqning bir pallasidan yasagan kemasida yo'lga tushadi.

Muzqaymoqning yog'och qoshig'ishi kakov

vazifasini o'taydi. Singapurni, Dubayni ko'rmoqchi bo'ladi...

Kitobdagi she'rlar ham quvnoq, ta'sirchan.

Kitobni o'qib, vaqtiniz xush o'tishiga ishonaman. Darvoqe, kitob haqidagi o'z fikr-mulohazalaringizni nashriyotga yoki muharririyatga yozib yuborsangiz ham bo'ladi.

# KITOBBLAR

# BO'R

Abdurahmon AKBAR



## GAZETASIGA OBUNA DAVOM ETMOQDA

Aziz mushtariylar! «Kitob dunyosi» gazetasida O'zbekiston Respublikasidagi «O'zbekiston», «O'qituvchi», «G'afur G'ulom», «Cho'lpon» nomidagi nashriyot-matbaa ijodiy uylari, «Yangi asr avlodi», «Fan», «Universitet» va boshqa hamma nashriyotlarda chop etilayotgan adabiy-badiiy, ilmiy-ommabop o'quv adabiyotlari va darsliklar ro'yxati berib boriladi.

Sizga esa qaysi nashriyotda qanday kitob chiqqani haqida ma'lumot olishingizda «Kitob dunyosi» gazetasi ko'maklashadi.

Obuna bo'ling, biz bilan hamrohlik qiling.

Obuna indeksimiz – 238.



### Muassislar:

O'zbekiston Matbuot va axborot agentligi, O'zbekiston Respublikasi Xalq ta'limi vazirligi, «KAMOLOT» yoshlar ijtimoiy harakati Markaziy Kengashi, «SOG'LOM AVLOD UCHUN» hukumatga qarashli bo'lmagan xalqaro xayriya jamg'armasi.

BOSH MUHARRIR: To'liqin HAYITOV

Dizayner va sahifalovchi: Zuhra MUXSIMOVA  
Navbatchi: Sayyora JO'RAYEVA

Gazeta O'zbekiston Matbuot va axborot agentligida 0208-raqam bilan 2007-yil 2-fevralda ro'yxatdan o'tgan.

TAHRIR HAY'ATI: G'ayrat SHOUMAROV, Dilbar ALIMJONOVA, Qahramon QURANBOYEV, Jabbor RAZZOQOV («O'zbekiston» NMIU Bosh muharrir o'rinbosari), Dilmurod RAHMATILLAYEV, Dilshoda DADAJONOVA, Feruza JALILOVA (Bosh muharrir o'rinbosari), Sobirjon SHARIPOV, Ergashvoy SARIQOV.

Manzilimiz: 700129, Toshkent shahri, Navoiy ko'chasi, 30-uy. Obuna indeksi: 198. e-mail: tong1924@mail.ru. Tel.: 244-27-25, 244-63-08. Tel./faks: (99871) 244-38-10

Rassom: Feruz MATYOQUBOV

«O'zbekiston» nashriyot-matbaa ijodiy uyida chop etildi. Haftaning dushanba kuni chiqadi. Shakli A-3, 2 bosma taboq.

Adadi - 49526 Buyurtma N: J 5439

## BUGUNNING



### «YANGI AVLOD»LARI

Tanishing! «Yangi avlod – 2007» bolalar ijodiyoti festivali g'olibi Adham Xo'jamqulov. U 2004-yildan Jizzax shahridagi P.I.Chaykovskiy nomli musiqa maktabida tahsil olib kelmoqda.

Ustoz-san'atkorlari: Faxriddin Sodiqov.

Sevimli kuyi: «Dutorim».

Yoqtirgan rangi: qora va ko'k.

Sevimli fani: matematika, rus tili.

Uning dutorda chalgan kuylarini eshitish nafaqat ustozlari, shuningdek, o'zi kabi iqtidorli tengdoshlariga ham zavq bag'ishlaydi.

– Men doim bo'sh vaqtimdan unumli foydalanishga harakat qilaman, kelajakda tadbirkor bo'lish istagida bo'lsam-da, o'zim sevgan asbob – dutorda turli kuylar yaratish niyatidaman, – deydi Adhamjon.

Biz ham bu yosh tengdoshimizga ulkan muvaffaqiyatlar tilaymiz.

Nazokatxon TOJIBOYEVA



## ULKAN SABZAVOTLAR




SABZI. Belgiyalik bir dehqon o'z tomorqasida og'irligi 1kg.200gr. keladigan sabzi kavlab olgan. Biroq, bundan ham katta sabzini angliyalik dehqon yetishtirgan edi.

«Ginnesning rekordlar kitobi»ga yozilgan bu sabzining vazni 1kg. 800 gr. bo'lgan. Yaponiyada sabzining uzunligi 1 metr va og'irligi 4 kg.gacha bo'lgan xillari bor. Shuni hisobga olgan dehqon o'z tomorqasida 3 kg. 500 gr.li

sabzi yetishtirishga muvaffaq bo'ladi.

SARIMSOQ. Oddiy vazni 50 gramm keladigan anjirdek sarimsoq bilan birga og'irligi 900 grammligi, kattaligi handalakdek keladigan sarimsoq ham AQSHning Gilroy shahridagi qishloq xo'jalik ko'rgazmasiga qo'yilgan.



## XANDA



– Dadamning tug'ilgan kunini butun dunyo nishonlaydi.

– Nima sababdan? U kishi shunchalar mashhurmi?

– Yo'q, dadam Yangi yil kechasi tug'ilganlar-da.

\*\*\*

– Oyi, siz ilgari sirkda ishlaganmisiz?

– Yo'q, nima edi?

– Nega unda xolam: «Oying dadangni qo'lida o'ynata oladi», deyaveradi?

## FABRIK



Aziz farzandlarim Xabibullo va Abdullo!

Tug'ilgan kuningiz bilan tabriklayman. Sizlarga salomatlik, baxt-saodat tilayman. Mustaqil yurtimizning munosib farzandlari bo'lib ulg'ayib, yaqinlaringizni hamisha xursand qilib yurishingizni xohlayman.

Oyijoningiz NARGIZA